

蜀中廣記

二八

卷之四

四

詳校官編修臣翟 槐

編修臣程嘉謨覆勘

總校官庶吉士臣何思鈞

校對官學正臣陳木

謄錄舉人臣曹勳祖

欽定四庫全書

蜀中廣記卷七十三

神仙記第三

川西道三

神仙傳云李意期者蜀人傳世見之或以為漢文帝時人也無妻息人欲遠行速至者意期以符與之并丹書兩腋下千里一日或說四方國土宮觀市鄠人未曾見聞說者

明曹學佺撰

意不解意期為撮土作之但盈寸其物皆是須臾消滅或  
行不知所之一年許復還或乞食得物對面與貧人於成  
都角中作土窟居冬夏單衣髮長剪去之皆使長五寸或  
二百日三百日不出窟劉玄德欲伐吳報關侯之怨使迎  
意期問吉凶意期不荅但求紙畫作兵馬器仗十數萬訖  
一一裂壞之曰吐又畫作一大人掘地埋之乃徑去先主  
不悅果為吳軍所敗十餘萬衆纔數百人得還器甲軍資  
略盡玄德忿怒遂卒於永安宮意期少言人有所問略不

對荅但占其顏色若歡悅則善慘戚則皆惡後入琅琊山中不復出也 按綿州志云富樂山洞靈觀李意期修煉所傳聞意期於寶蓋山白日昇舉移時猶聞笙樂之音

魏了翁朝貞觀記畧云出少城西北為朝貞觀觀中左列有聖母仙師乘烟葛女之祠觀西有武侯祠是丞相亮故宅也故老相傳亮有女子宅中乘雲輕舉唐天寶元年章公始更祠為觀奏名乘烟 按寰宇記諸葛讀書臺在章城門路西今為乘烟觀

方輿勝覽云長生觀舊名碧落觀在青城縣北二十里昔有范寂字無為劉先主時栖止青城山中以修煉為事先主徵之不起就封為逍遙公得長生久視之道劉禪易其宅為長生觀有巨楠高數十尋圍三千尺世傳長生手植上有赤城閣陸游詩云斷雲浮月磬聲殘木影如龍布石盤偶駕青鸞塵世窄閒吹玉笛洞天寒竒香滿院晨吹藥異氣穿巖夜沐丹却笑飛仙未忘俗金貂猶帶侍中冠按畫苑孫太古畫碧落侍中范長生舉手整貂蟬像特妙

太霄經曰吳大帝時蜀中有李阿者穴居不食累世見之  
號曰百歲翁人往問事阿無所言但見阿顏色若欣然則  
吉若慘戚則凶若含笑則大慶微歎則深憂如此之候未  
曾不審也有古强者疑阿異人常親事之試隨阿還所宿  
乃在青城山中強後復欲隨阿去然身未知道恐有虎狼  
私持其父刀往阿見而怒曰汝隨我行那畏虎也取強刀  
以擊石刀折壞強竊憂刀敗至旦隨出阿問強曰汝愁刀敗  
耶強言實恐父恠怒阿乃取刀磋石擊地刀復如故強隨

阿還成都未至道逢人奔車阿以脚置其車下輾脚皆折  
阿即死強怖守視之須臾阿起以手撫脚而復如常強年  
十八見阿年五十許強年八十餘而阿猶然不異 按李  
石龍迹觀記略成都府十里有道士觀唐乾寧間桂州功  
曹楊素故宅也九幽拔罪經云李真人阿常居此 又按  
洪雅志李阿真人煉丹於金釜山宋乾道七年十月勅封  
觀妙真人誥詞云仙者古不死之謂也其精爽寓世猶人  
焉阿著跡典午今代煉形洪雅之山張雲龍之飛騰想風

雨之來下爰一道家之流錫以真籍之稱慰民所依其永  
綏祐可特封觀妙真人奉勅如右

真誥云侍帝晨有中郎直事四人如世之尚書也為戴淵  
公孫度劉封郭嘉今見在職封者是立德之養子立德今  
為北河侯與韓遂對統屬仙官註云魏武孫權今位任皆  
高劉職雖小而隸仙官矣

雲笈七籤云晉道士張蓋翕精思於岷山石室中得岷山  
丹方其法鼓黃銅以作方諸承取月水又以水銀覆之致

日精火其中長服之不死又取此丹置雄黃銅燧中覆以汞暴二十日發而治之以井花水服如小豆大百日盲者能視百病即愈髮白還黑齒墮更生

晉劉亮彭城人泰始中歷黃門郎梁益二州刺史在任廉儉不營財貨所餘公祿悉以還官太宗嘉之下詔褒美亮在梁州忽服食修道欲至長生迎武當山道士孫道胤令合仙藥至益州泰豫元年藥始成而未出火毒孫不聽亮服亮苦欲服平旦開城門取井華水服之至食鼓後心動

如刺中間便絕後人逢亮乘白馬將數十人出關西行共  
語分明此乃道家所謂尸解者也出南宋書

晉鄧寶彭縣人事父母至孝其家酤酒得利即奉甘旨常

有二客過飲見寶事親盡禮每嗟異之歲餘謂寶曰汝孝

行可嘉學道有緣寶聞異之潛隨其後行二十餘里過江

亦不陷溺及與登山見其前後廊廡深廣竒花恠石皆神

仙境界二客見寶笑曰汝亦來耶引之周覽不覺饑渴謂

寶曰汝離家久母念成疾與藥兩丸令救其母遂出回顧

舊處無復所有至家已二年矣寶以藥獻其母疾愈壽百餘母終結廬墓側其後二客詣廬召入葛瓚洞天

崔鴻蜀錄云西山范賢一名長生岩居穴處求道養志李雄欲迎致以為君長不就乃尊為天地太師封西山侯按方輿勝覽青城有老人村昔潛夫張不羣入山採藥浹旬不返見一叟致敬而問曰吾族本丞相范賢之裔范公知李雄之祚不承挈吾輩居此為終焉計圖經云即老澤也

馮真人名益羅廣漢人居合州龍多山山有臺高十餘丈

俗名石圀真人煉丹其上婦汲水於松下獲茯苓如嬰兒  
狀蒸餌之舉家十七人同飛昇時晉永嘉元年七月十五  
日也後人建仙臺觀繪像事之宋淳熙初以真人事狀于  
朝賜號冲妙上有丹灶仙洞飛仙泉大夫松今泉洞尚存  
按何騏龍多山仙臺詩曰世路聳牙赤水過故升天險  
問龍多書中舊識唐公昉圖裏今聞馮蓋羅

搜神記曰吳猛蜀郡人小兒時在父母傍卧時夏月多蚊  
而終不搖扇懼蚊虻之去我及父母也父母亡不立家室

雲遊登廬山過石梁見一老坐柱樹下以玉杯承甘露與  
猛飲之得道封為大洞君

晉袁彥伯羅山疏曰善道門戶在石室北壁下形骸朽壞  
止有白骨在昔成都識此道士聞之使人慨然其業行殊  
異異當蟬蛻解骨石室中先有壺盛香得便掃除燒香今  
此香具猶存

十二真君傳云許真君遜字敬之汝南人也弱冠舉孝廉  
拜蜀旌陽令尋以晉室琴亂弃官東歸學道拔宅昇天

按元虞集旌陽祠堂記曰吾蜀之為土在地勢西南而尊  
高山川神靈多古仙人遺迹非必皆詭異荒唐之說也達  
高深之源據精氣之會以出變化而佐生成功業通乎古  
今惠澤遍乎邦域是故跡有顯異事有沿革歷千數百歲  
而不能忘者豈偶然與德陽有故令許君祠君諱遜字敬  
之其先潁陽許由之裔曾祖玟漢末避地豫章吳赤烏二  
年君生焉神明天誥讀書通天文地理音律五行經緯之  
學獵射中鹿子鹿母舐之大感動折弓矢去修神仙之術